

Alexander Loretz-Schmidt, Rueras

1923-2006



bb-Udir il tuccar dil zenn da miert ei adina in mument pensiv. Tgi ei vegniu clamau, tgi ha stuiu ira, tgi ha astgau ira, sedamondan ins bugen. Forsa prendein nus in tec peda per quellas ni otras ponderaziuns, mo savens eis ei aschia ch'il il davos tun dil zenn ei strusch sparius en l'aurora che nos patratgs ein puspei vid il quotidian. Cura ch'il zenn grond ha tuccau per Alexander Loretz ei sein enqualin sedumandaus: gie viveva quel aunc. Il

motiv ei spert sclarius pertgei dapi la pensiun ei igl Alexander vivius fetg ruasseivels. Ils dus davos onns han vegliadetgna e malsogna spossau el e reteniu el en casa aschia ch'ina sentupada casuala era buca pli pusseivla. Il zenn grond ei vegnius mets, il defunct ruaussa sin santeri ed il davos che nus savein far per el ei: schar reviver el aunc inagada cun sias diversas varts senza vuler giudicar tgei ei stau bien e tgei meins bien. Ei possi esser in omagi ad ina persuna ch'ei vividia denter nus, cun nus, ei stada en per nossa cumionza, luvrav per il beinstar da biars da nus cun metter a disposiziun sia forzas e sia savida.

Igl Alexander Loretz ei naschius a Selva igl onn 1923. Per ses geniturs Gion Antoni Loretz (*1889 +1949) e la mumma Constanzia Loretz-Berther (*1896 +1964) eis el staus il premnaschiu. Selva era lu in vitg muntagnard populaus spirmein da famiglias purilas. Ina casa, ina sin l'autra. In marighel casas cun muschnunas da crappa encunter mun che duevan proteger dallas lavinas che smanatschavan ils liungs unviarns. En quei stretg ambient eis el carschius si ensemene cun 10 ulteriurs fargliuns. Il bab ei morts baul e sco fegl vegl ha ei muntau baul da segidar cun sia mumma. Strusch vegn enzatgi a ver dumandau vulas ni pos? Igl ei stau da tschappar en, segidar e luvrar. Cura che ses fargliuns han sez pudiu far la lavur dil pur ed igl ei strusch stau pusseivel che tutsstattan a casa ha ei giu num da mirar per lavur. Quella era scarta e mintga caschun vegneva prida per saver sedustar. Ad uaul ni sco cramper tier la viafier Furca Alpu ein els sedustai ed anflau plirs onns fadigia. Igl onn 1947 han ils Loretz baghegiau casa nova. La lenna per la casa han els transportau cun lur agen cavagli si da Cavorgia. La crappa ora da Surcrestas nua ch'ils vegls suloms dallas casas da leu ein vegni schubergiai ed il sablun vegneva si da Trun. Els eran in tschuat umens e la luschezia ei stada lur casa nova. Da quella lavur raquintava igl Alexander cun plascher, nus schevan magari cun quet, mo in quet ch'el astgava era ver. La

perschuasiun da haver giu fatg ina bein gartegiada ova savevan ins leger giu da sia fatscha quels muments. Ch'els han giu in bien patertgar cun il sulom dalla casa eis ei semussau cura che Selva ei barschaus giu in onn suenter. Empau ord liug eis ella stada ord il prighel e sco ina dallas duas sulettes casas mitschada da quella tresta disgrazia. Denton il fiug da Selva ha dau la frida mortala al vitget. Era la casa dils Loretz ei zacu vegnida vita, ha surviu e survescha aunc oz sco casa da colonias. Denton in pign monument dad in temps buca schi daditg vargaus resta ella per tut quels che han luvrau e viviu en quella.

Igl ir a mattauns enta Selva era per ils da Selva buca sempel. Las biaras famiglias eran parentadas ed aschia eis ei buca stau da surstar che era Alexander ha priu la via sut ils peis ed ius pli lunsch per anflar sia spusa. Schebein quei ei stau cura ch'el ha tratg lenna si da Cavorgia hael buca anflau ora. E la finala astgan misteris era star misteris. Denton gest giu leu ha el anflau sia preferida e buca pli schau luc. Igl onn 1956 maridan els e secasan enta Selva. In onn pli tard secasan els a Rueras en casa paterna dalla mumma Constanzia Loretz-Berther. Cheu ein tuttas lur sis feglias naschidas e carschidas si. In marighel buobas che han dau veta, purtau legria, speronzas ed era fastedis e quitaus sco tut sin quest mund. El e sia dunna han luvrau e barhau senza cal e possibilitau a scadina feglia il pass ora en la veta. Navenda la viafier ha el anflau lavur tier la firma Murer e lu 28 onns tier las Ovras electricas Rein Anterior. Cheu ha el anflau sia plazza preferida, cheu eis el staus e luvrau tochen tier la pensiun.

Dotaus cun buns talents ei il defunct Alexander segir staus. Siu attestat da scola demuossa quei aunc oz. Bunas notas; il bia dad ins, silpli in da dus e tier il cumpartament ei adina scret: fetg buns. Quels siat onns da scola enta Selva eis el vegnius scolaus dalla scolasta Ursula Cavegn da Rueras e silsuunter da scolast Gieriet Giusep ed igl otgavel onn a Schluein en la scola dil Löwenberg. Ils buns dunns ein sco tier ina gronda part dalla generaziun da lu stai cheu, mo saver sviluppar els, haver la cuvida da survegnir la lavur per quels dunns ei savens buca stau pusseivel. Era tier igl Alexander ei quei buca iu auter. El ei denton segidaus en uniuns, en quei e tschei uffeci e segir staus aschia in sustegn per la cumionza. Igl onn 1969 eis el schizun staus president dil cussegli da scola da Tujetsch.

Ussa ruaussa siu terrester sin santeri sut baselgia Sogn Vigeli. Sco gia giu detg er'ei vegniu dapi sia pensiun fetg ruasseivel entuorn el. Sia ferma cardientscha ha gidau el cura ch'el ha sentiu che malsogna e vegliadetgna consumeschan sias forzas. Quei che ha adina fatg impressiun a mi en tut quels onns da vegliadetgna era sia cuntentientscha. «Ju a bien, tgei vi ju aun daplé ?!» Quei bien, quella cuntentientscha e la pasch possi el era ver anflau en la patria celestiala. Sin seveser.